

ORATIO

HABITA IN

GYMNASIO PATAVINO

A

SIMONE STRATICO

P. P.

Cum Mathesim & Theoriam Nauticam
tradere aggredideretur

AN. CIOCCCLXIV. V. ID. DECEMBR.



F.V.

PATAVII. CIOCCCLXV.

TYPIS COMINIANIS.

Superiorum Permissu.

Digitized by the Internet Archive
in 2019 with funding from
Wellcome Library

TRIUMVIRIS
REI LITTERARIÆ MODERATORIBUS
ANGELO CONTARENO
ÆDIS D. MARCI PROCURATORI,
LAURENTIO MAUROCENO
EQUITI ET ÆDIS D. MARCI PROCURATORI,
HIERONYMO GRIMANO
SENATORI AMPLISSIMO

SIMON STRATICO. F.



Et fructum suorum laborum uberrimum consequantur, eosdem ita debent

bent instituerere, ut iis simul ingenii
dotibus ornari studeant, quas com-
mendant homines rerum experientia
docti & usu vitæ prudentes. Ho-
rum cœtus nimia non poscit atque
mirifica, ut vulgus solet, quem mi-
rabilitas unice allectat, neque in an-
gusto notionum orbe versatur, re-
rum pluribus ac variis nexibus per-
cipiendis ineptus, quod hominibus
evenit umbratili vitæ & contempla-
tioni tantum assuetis; sed illam in-
genii moderationem atque constan-
tiam maxime probat, qua ad osten-
tationem doctrine temere nihil pro-
mittitur, aut ad inanem curiosita-
tem nihil proponitur, verum absque
cunctatione, ex disciplinæ præceptis
uti-

utilia solerter suscipiuntur ac suscepta naviter perficiuntur. Cogitare id ac conari debent imprimis Matheos studiosi, disciplina nimirum, quæ a rerum concretione abducta, in earundem imaginibus fictis tanta vi rationis ingenia detinet, ut ab rerum ipsarum observatione, quæ tarda ac lenta est, ferme distineat, & nisi freno quasi quodam cobibeantur, ad inania rapiat commenta, ac distrahat omnino mentis vires. Quæ cum perpenderem sedem hanc decreto vestro, TRIUMVIRI AMPLISSIMI, ingressurus, ut optime institutionis fundamenta designarem, quæ causæ disciplinæ hujus rectum usum corrumpant, indicare suscepi, atque

demonstrare ex communis rationis
principiis, quo pacto & quam late
fundi possit ejusdem in Artibus uti-
litas. Ostendere idcirco mihi necesse
fuit mathesim puram, que circa nu-
merorum ac figurarum proprietates
versatur, esse rationis auxilium, &
methodum designandi certis ac sen-
sui objectis modis progressus ratioci-
nationis difficiles & implexos, aut
quavis de causa fugaces. Quo fit
ut ipsa per se iners, subtilis instru-
menti instar, usu tantum noscatur
apta peræque egregiis operibus per-
ficiendis, gravibusque erroribus in-
ducendis. Quippe traducta ad res,
que a natura aut artibus offerun-
tur, magnopere quidem ipsa facit

ut

ut demonstrationis ordinem & vim
inire videantur, facem veluti quam-
dam menti prætendens, quam sequu-
ta ratione nectat quæ disjuncta vi-
dentur & vinculo nullo coherentia;
sed etiam quod res ipsas ex unico
& absoluto representat aspectu, in-
cautos decipit. Delectant enim ma-
thematicæ meditationes ob id præ-
sertim, quod observatione rerum nul-
la laboriosa adhibita, Theorematis
ac formulis generalibus multiplices
casus investigationis alicujus viden-
tur posse complecti: verumtamen cum
nihil re ipsa deformius, quam quod
geometricè absolutissimum est, atque
etiam cum difficile admodum sit ge-
neralia Theoremata ad singulares ca-
sus

sus utiliter recteque adducere, aut
hos ex illis prompte derivare, di-
sciplina ipsa nobili caret usu, nisi
ad eandem adjuncta sit notitia ar-
tificiorum ac rerum, prout a natu-
ra oblatae aut industria hominum
& longa experientia perfecta sunt.
Quam qui constanter persequitur, il-
le rejecto inutili studio omnia geo-
metricis vocibus intermiscendi, quod
plures illicit, facilitatem quandam
judicandi acquirit, discernendi saga-
citatem, & res sibi cognitae oppor-
tune applicandi solertiam, ex qui-
bus eminet, aut certe numquam con-
temnitur: cum demum tolerabilius
multo sit cujus ratio recta est, &
multiplex ac firma experientia, in-
du-

dustriam esse breviorē, quam cu-
jus ingenium alacre est, ejus ratio-
nem observandi negligentia & im-
peritia rerum turpiter occupari.

Sentio equidem hisce vestigiis in-
sistentibus laudem ex hoc studiorum
genere non defuturam, eaque ut di-
ligenter instituendis Adolescentibus
ostendam, officium hoc ipsum quod
gero peculiari ratione jubet. Nam
quod prudentissimo decreto vestro pau-
cis abhinc annis ad hanc Matheseos
Exedram adjunctum est Nauticæ Ar-
tis tradendæ munus, quæ Ars Me-
chanicarum fere omnium summam con-
tinet, & matheseos partibus cunctis
utitur ad fines varios, magnique
momenti in Artis ipsius exercitatio-
ne,

ne, id ita intelligo, ut Artium perpetua historia mihi sint mathematicæ meditationes illustrandæ, & indicandæ cautiones, quæ faciunt ut recte consociari queant. Quod quidem consilium confirmat & gratius reddit apparatus mihi nuper jussu vestro concreditus instrumentorum atque exemplarium Geometricorum ac Nauticorum, quorum ope plura possint oculis fidelibus subjici, quemque munificentia vestra in hujus Exedre commodum atque Gymnasii desideratum ornamentum in dies auctum iri confido.

Cur autem orationem hanc nominis vestri, TRIUMVIRI AMPLISSIMI, commendatione exornatum

tam in vulgus emiserim, non id sane fuit ut ex levi admodum studiorum specimine laudem mihi aliquam comparare posse crediderim, multoque minus quod putarim, quidquam interesse disciplinae praeclaræ ne delitesceret. Sed uniuscujusque non est magnis unice rebus occupatum esse, ac suum porro quemque exercere debet officium: & Vos, Viri eximii generis ac morum nobilitate praeclarisque gestis & splendidis Reipublicæ procurationibus præstantissimi, vigilantissimo ac munificentissimo studiorum nostrorum regimine nobis impense colendi, conatus nostros utcumque exiguos comiter soletis excipere. Quod ego dum reputo, etiam-

si

si mihi adeo non blandiar, ut aliquid magnum iudicem, quod devotus offero, certe illud jucundo afficit sensu, perenne erga vos perpetui cultus mei testimonium protulisse.

Patau. XIII. Kal. Sept. C1D1CCCLXV.



UAMQUAM digni-
tas loci hujus, Vi-
rorum celeberrimo-
rum, qui eundem
tenuerunt, fama
nominis, & sapien-

tiae præclaræ monumentis amplificata,
atque Triumvirum Rei Litterariæ Mo-
deratorum perhonorificum de me ju-
dicium, quo mutato quadantenus in-
stituto a Medicinæ Elementis traden-
dis ad hanc Sedem evehor, animi vi-
res ad majora conanda momento gra-

A

vissi-

vissimo excitent , & alacrem ad laudem aliquam inde capeffendam faciant ; fateor tamen cum ea circumfpicio , ex quibus fufcepti a me muneris magnitudo æftimanda prudenter eft , non leviter commoveri . Mathematicos , & Nauticæ doctrina tradenda mihi eft demandata , antiquo decore & cultu nobilis , rei fubiectæ varietate multiplici , & veritatis quo fruitur adfpectu perpetuo jucunda , curis hominum aucta ut ufu latiffime pateat , ftimulo frequenter injecto in novis perveftigandis acerrima ; ab iis ampliffimis graviffimisque viris commiffa , a quibus omnia summa & poftulantur & expectantur ; in ea Civitate profitenda , ex qua , rerum omnium clariffimarum commendatione nobilitata , antiquæ ferme poffeffionis jure Mathematicorum industria ad focietatis commoda requiritur , advocatur , utiliter adhibetur ; in hoc Gymnafio excolenda , quod omnigenæ doctrinæ laude omni ævo florentiffimum harum

di-

disciplinarum summos Auctores semper habuit ; ex hoc loco dictanda , ex quo longa & nunquam abrupta serie Viri in hac facultate principes docuerunt . Maximum profecto id esse , quod a me deposcitur , facile intelligo , atque si labore , exercitatione , sedulitate efficere poterò , ut non inutilem operam in hoc munus impendam , ex eoque nomine Augusti Senatus liberalitati quodammodo respondeam , id adhuc ferme difficillimum sentio , ut eorum , qui longo agmine præcesserunt , famæ dignitatique respondere possim . Nam cum vetera hujus Exedræ decora immortalia Galilæi , Guglielmini , Hermanni , Bernulli clara & suspicienda sint , nec longinquitate temporis extenuata , ea porro mirifice nobilitata elucet & amplificata diuturna Marchionis POLENI possessione , cujus nomen cum ipsis tantum Scientiis consenescere poterit , cujus recens & vivida imago ante omnium animos obversatur . Imprimis vehe-

menter perturbor, cum vestrum ocu-
 los hunc in locum converfos cerno,
 suavi antehac consuetudine spectare
 solitos fruique Viri incomparabilis
 præsentia, animosque reputo quæren-
 tes doctrinæ delectum, eruditionis mul-
 tjugæ ubertatem, dicendi copiam,
 quibus Geometricas meditationes or-
 nare poterat, atque severiorem Ma-
 thesim docendo exhilarare. Qui cum
 XL. annos locum hunc tenuerit, Ma-
 theseos partes utiliores omnes ita est
 executus, ut quæ alii excogitave-
 rant, ex Librorum uberrima supelle-
 ctile lectione assidua haustum afferret;
 quæ ipse invenerat, summa qua pol-
 lebat ingenii maturitate explicaret;
 cuncta ad Artium incrementa conge-
 reret; in Gymnasio utilis, in Urbe
 celebris, in Veneta & Pontificia di-
 ctione operibus clarus, in orbe littera-
 rio laude multiplici famigeratissimus,
 in Historia Scientiarum futurus im-
 mortalis. Eo maximarum artium apte
 disposito concursu factum est ut limi-
 tes

tes omnium accurate cognoscere certeque definire posset, ideoque potissimum æstimare quæ disciplinæ quam profitebatur vis esset, & ab ea quid ad alias afferre deberet, ac jure ab aliis postulari. Ad eximiam enim Mathematicæ penitioris cognitionem adiunxit singularem prudentiam, in ea ad usus humanos applicanda, & finibus pervidendis utilitatis, quam Artibus ad vitæ commodum aut ornamentum excogitatis importare potest, quorum alterum ingenii vim acrem & experientiam, alterum alacritatis ingenii nimix moderationem aptam flagitat. Quippe non desunt, qui admiratione Matheos immoderata abrepti majora de ea polliceantur, quam præstare queat, ut interea, dum ejus vim & dignitatem amplificare student, ejusdem in hominum animis opinionem imminuant, ubi, cum ad rem ventum est, promissa fallunt. Nam magna pars hominum, quid boni a doctrinarum studiis consequatur, requirunt, eaque bo-

na ex operibus æstimare solent, quod aut iis unice afficiantur, aut ab interiore contemplatione rerum abducti de doctrinæ pulchritudine, utilitate, gravitate ex effectu tantummodo judicare possint. Est autem querela frequens in artificiis, quæ ad hominum usus spectant, & Mathematicorum consilio perficienda sunt, hos aut parum valere, aut sæpe minus quam vulgares homines, qui nullo scientiæ apparatu instructi, perspicacitate infita ingenii exercitatione aucta, obtinere norunt, quæ laboriosa supputatione Geometræ nequeunt. Geometrarum meditationes operosas contemplationem otiosam, aut inanem forte curiositatem maximam partem esse, quippe quæ aut ad vitæ usus & experimenta non traducuntur, aut si traducantur, non raro deficiunt. Vim ingenii studiis iis obtundi potius & arctari, quam acui lateque porrigi, dum ea, quæ rerum ipsa natura considerata suppeditat, discerpunt, mem-

brif-

brisque sepositis, quæ computationi se submittere respuunt, rerum quasi formas vanescentes unice spectant, resque reddunt curatura junceas. Quo fit, ut a rebus abductus animus, commentisque suis inspiciendis assuetus, cum se se ad res convertit, harum obversante compositione confusus hæreat, ac nova rerum facie percussus obstupescat. Quare si ad movenda pondera, extruenda ædificia, excogitandas machinas, aquarum regendos cursus, navium construendas aut reficiendas moles, dirigenda itinera Mathematici advocentur, & ab iis quærat auxilium, sæpe cedant oportet imperitis usque doctis hominibus, qui rerum implicationi assueti propositi expediendi viam aptiorem atque simpliciore excogitant. Quæ cum intuentur homines, Artes concludunt societate Matheleos, aut Theorematum hypotheticorum pondere corruptas, aut certe non promotas fuisse: Geometricam methodum Scientiis pluribus

accommodatam earum firmitatem, amplitudinem, evidentiam non auxisse; contra potius ex infano Methodi amore, atque studio omnia vi rationis ac ex principiis deducendi, historiam fidamque observationem eorum, quæ natura aut Artes offerunt, esse posthabitam.

Hæc quidem, & alia, quæ subinde proferuntur, cum mecum reputarem atque intelligerem permulta non adeo temere iniici, ut ex infectandi studio, vel hominum ignavia ducta videri queant: alia ex falsa opinione de natura Matheſeos derivari: nonnulla ex intemperantia ingenii, qua factum est, ut alieno seu loco seu tempore Geometria intrusa sit, vim & pondus acquirere; ne lectissimi Adolescentes aut hujusmodi dictorum impetu deterreantur, aut promissis jactationibusque aliorum in falsam de Matheſeos vi opinionem alliciantur, sed artem gravissimam integra incorruptaque mente adeant; in hoc ipso limi-
ne

ne & Exercitationum proëmio Mathematicæ disciplinæ indolem, & naturam explicare constitui; tum vero usum, quem in artibus habet & habere majorem assidue potest, ostendere, si quos ipsa indicat limites observentur. Communia namque Artibus atque Mathesi principia sunt, & huic illæ ita respondent, ut quicquid accuratum est Geometricum, quicquid minus accuratum ad artes Mechanicas referatur: quarum itaque accuratio minor & æstimari apte & perfici comparando potest Mathesi facem præferente & menti normam exhibente, quæ ad res prudenter applicetur. Applicatio autem eo facilior est ac tutior, quo ea, in quibus versantur Artes, simpliciora sunt, aut observando magis innotescunt, aut certioribus finibus includuntur. Quæ vero implicata adeo & involuta ex sui natura sunt, ut comparationis terminos exploratos ac definitos nullos exhibeant, illa ad Geometricam normam

violenter adiguntur & inani ferme labore , cum non quid ingeniose sed quid vere , non quid meditatione sed quid opere , non quid curiose sed quid utiliter propositum fuerit , requiratur .

Cum multiplices ideæ sint , quas acquirit humana mens sensuum ministerio , qui rerum externarum impulsibus afficiuntur , earumque idearum comparatio assidue fiat , tum quod plures simul excitentur , tum quod aliæ memoriæ adiumento revocatæ associentur , simpliciores atque frequentius recurrentes sunt notiones quantitatis in numero aut in extenso spectatæ . Comparationes magni & parvi , multi & pauci , contenti & continentis , similis & dissimilis , æqualis & inæqualis primos constituunt humanæ cognitionis gradus : in iisdem primo exercetur iudicandi facultas : eademque rationes suppeditant ea æstimandi , ad quæ necessitas vitæ varia aut curiositas aut animi affectio aliqua cogit attendere .

Ea-

Earum comparationum usu in idea extensi discernit mens, ab eademque abstrahit notiones longitudinis, latitudinis, altitudinis, recti, curvi, figuræ, inclinationis, mutuæ positionis; ab idea numeri notiones unitatis, partium, seriei. Quæ notiones cum similiter genitæ sint in omnibus hominibus, iisdem rationibus excitatæ, eademque progressionem evolutæ, utcumque verbis significantur ac definiantur ut apte communicari queant, eandem intelligentiam in omnibus pariant necesse est; quandoquidem definitionum ejusmodi non alia vis est, quam ut mens admoneatur, ut ad ea attendat, quæ jampridem usu sensuum adumbrata perceperat. Iisdem notionibus tanquam fundamentis innituntur geminæ illæ Scientiæ, Geometria & Arithmetica, quæ simplices illas ideas comparando implexas magis, & a sensuum testimonio magis remotas figurarum & numerorum proprietates deducunt. Atque cum in ratiocinationis progressu

in-

integram & incorruptam principiorum notionem fervent, eorum, quæ colligunt ac concludunt, æqualis vis apud omnes est, & æque perspicua veritas ab opinionum inconstantia tuta permanet: neque multiplici notionum inter se aptarum interpositione minuitur, cum quicquid incertum, obscurum, admirabile ex impercepto notionum nexu menti rudi est, progressu ordinato rationis evidens & antea præconceptis aperte consentaneum appareat.

Utriusque Scientiæ cum idem ingenium fit eademque evidentiâ, magis a sensibus abducta contemplatio numerorum est, quam figurarum: hæc imagines objectas habet certis inclusas finibus, intra quos consistendo quantitatis notiones comparentur; Arithmetica versatur in ideis magis universalibus & minus explicatis. Atque cum earum disciplinarum propositum idem sit, ut quæ obviæ non sunt quantitatis a rebus corporeis abstractæ proprie-

prietates & affectiones ad evidentiam perducantur, in id præsertim hominum incubuit industria, ut adjuncta methodi & phantasiæ apta subsidia comparentur, ne in ratiocinando mens implicata hæreret, sed ordinem assequeretur, quo ideæ aliæ alias antecedunt aut subsequuntur, ex quo perspecto evidentia manat ratiocinationis: aut etiamsi ordo ille distincte non perciperetur, servaretur tamen certis exploratisque regulis mentem regentibus, ex quibus conclusum certum esse colligitur. Nam humanis ingeniis, utcumque variis, id commune est, ut se se quadantenus intendere possint, in eaque intentione aliquandiu permanere: quorum primum si deficiat in causa est, ut nexus idearum in demonstrationibus abrumpatur, nec ad evidentiam animus adducatur: alterum si sit imminutum, conclusio- nem pervertat atque corrumpat. Atque utrique succurritur, dum quæ mente percepta sunt, notis sensilibus de-

fi-

signantur, ac ad sensuum ferme testimonium transferuntur. Quapropter ad figurarum expendendas proprietates, figuras ipsas descriptas Geometria postulat, atque dum imaginibus utitur, quibus repræsentantur ea, quæ animo concepta sunt, ad oculorum testimonium conceptiones adducit, etsi tam diversa illæ imagines sint ab iis, quæ mens concipit, quantum Geometrica accuratio a Mechanica imperfectione distat. Quo quidem adminiculo etsi magnum menti afferatur adjumentum, contentione aliqua eidem est opus, dum proportionum evidentias, quas assequitur, figuris ipsis inhærentes contemplari coacta est. In Arithmetica vero explicatæ minus ideæ numerorum & magis universales signis quibuslibet denotari queunt, quod eorum nulla cum ideis similitudo sit. Hinc ad computationem numerorum signa aliqua inventa sunt, quibus indicantur, iisque certæ leges impositæ, quas observando computatio perficitur, &

con-

conclusionis veritas in dubium non revocatur. Atque id ita profecto, ut si loco eorum, qui vulgo adhibentur characteres Arithmetici, alii plures paucioresve eligerentur, aliisque legibus subjicerentur, novæ computandi rationes obtineri possent, utilitate varia præstantes. Nam si loco decuplæ progressionis, quæ in vulgari Arithmetica nunc adhibetur, dupla progressio & bini characteres eligerentur, computandi rationes commodæ aliquæ inde fluerent, quemadmodum Leibnitzius ostendit. Vel iterum si duodecupla progressio & duodecim characteres adhiberentur, alia eaque maxima in computatione commoda posse derivari facile ostenditur, ex eo quod plures numerorum inter se rationes obviæ sunt: ut intelligatur, Arithmeticæ progressus magnam partem ex ea industria in numeris designandis dependere. Ex ea enim meditatione doctrina sublimis derivata est Logarithmorum & Serierum infi-

nitaram , cujus ufus in implexis numerorum rationibus subducendis maximus eft, non quod illæ, cum definitæ fint, a quacumque notationis industria mutantur, fed quod methodis illiusmodi ita refolvantur, ut expedite magis & a pluribus ingeniis, minore contentione adhibita, attingi poffint.

Mathematici vero cum in id incumberent, ut expedita maxime methodus obtineretur explorandi affectiones quantitatis, Algebrae præfidia excogitarunt. Ipfa namque & Geometria & Arithmetica longe fimplicior, quantitatis affectiones & rationes ita comparat, ut mens neque imaginum figurarumque limitibus, neque certorum numerorum definitis habitudinibus contineri debeat. Quocirca neque fignis uti necesse habet, quæ rei conceptæ fimilia fint ut Geometria, neque certo definitoque numero alligatis ut Arithmetica, fed indefinitis & univerfalibus & ad omnem proportionem

nem

nem designandam aptis . Quo vero pauciora sunt ea , ad quæ quis in ratiocinando attendere debet , eo simplicior progressus est , atque multo plura comprehendit . Est autem Algebrae disciplinæ ingenium ejusmodi , ut mens abducta a rei , quam assequi studet , consideratione distincta , ad eam progrediatur certarum regularum , quæ fallere nequeunt , ductum sequens , quæ , cum exploratæ usque familiæ effectæ sunt , parvam admodum mentis contentionem postulant . Quapropter disciplinæ ejusdem adminiculo ad Geometriam & Arithmeticam applicatæ multa recentioribus temporibus detecta sunt , earumque Scientiarum fines longe promoti , atque indicati fontes , ex quibus eximia Theoremata , quæ Veteres ingeniose & multa circuitione demonstrarunt , expedite derivari queant .

Porro quoniam in rebus , præter numeri & extensi ideas , qualitates etiam percipimus , easque sensu mo-

nemur intendi remittique posse, cum quantitati, quæ augeri minuique potest, apte respondeant, ad harum æstimationem, cui accurate instituendæ mentis vis penitus impar est, quantitatis proprietates ac figurarum distincte sensu percipiendæ transferri queunt. Quare de motu, ejusque directione, quantitate ac legibus ratiocinatio instituitur, convenientia observata inter velocitates, tempora ac lineas majores aut minores, curvas aut rectas, quæ a corpore in motum actò describuntur. Vires a directione distinguuntur, ex effectu æstimantur; effectus autem per aliquam communem mensuram aut unitatem repræsentatur. Sonorum diuturnitates ac intervalla numeris designantur aut lineis. Lucis proprietates ad linearum figurarumque rationes adducuntur. Facile vero unusquisque intelligit, ex numerorum rationibus, figurarumque imaginibus, & generatim ex quantitatis comparationibus obtineri numquam, ut aliqua percipiat ani-

animus iis similia , quæ per singulos sensus ad ipsum deferuntur, vel ut virium essentiam , differentias intelligat , quantitatem communicationisque rationem assequatur. Verumtamen per ejusmodi symbola , quæ rerum inter se proportionales adumbratas exprimunt , qualitatum corporearum gradus confert & evolvit leges , easque computationi submittit, dum quæ ex natura sui habent ut fluant , simul considerare potest, quorum impressiones vanescunt, permanentes reddit semperque præsentis, quæ mens percipit, oculis subjicit, atque ratiocinandi facultatem ad æstimandas compositiones qualitatum sensu nondum perceptas adducit. Ex eo factum est, ut latissime sese diffuderit vis Geometriæ & Arithmeticæ, atque physicæ leges Mathematica ratione ab hominibus expenderentur, ipsa in societatem advocata perquisitionum omnium, quæ circa corpora, eorumque phænomena instituantur. Inde Mechanica, Optica,

Acustica, Hydrostatica, Hydraulica, Astronomia, aliæque mixtæ Matheseos fluxere partes, & amplificatæ sunt, prout in quantitatis & magnitudinum computandarum methodis progressa industria hominum est, atque naturalis Philosophia ad Geometricæ demonstrationis evidentiam aliquatenus perducta.

At Mathematicæ ratiocinationes, cum ad res applicantur, varios offendunt limites, qui rerum ex observatione pendent; quo fit ut Mathematicæ ad Physicam applicatæ demonstrationis vis cum ipsa natura rerum accuratius consentiat, quo ea, quæ mente conclusa sunt, ab iis, quæ sensus experiundo percipit, minus aberrabunt, ac sensus ipse minus aberrabit ab iis, quæ rerum natura peragit & observationi subjicit. Minus autem aberrabit sensus in observando, quo simpliciora ea sunt quæ observantur, aut si composita & implicata sunt, cujusmodi in rerum natura frequenter

occurrunt, quo pauciora sunt ea, quorum in iisdem ratio habetur. Hinc Mathematicæ evidentia cum phænomenis naturalibus congruentia juxta eam rationem eminet in disciplinis Physico - Mathematicis, eamque respiciunt idcirco considerationes rerum, quæ implexæ sunt, quasque ex nonnullis tantum qualitatibus spectare inutile est. Quapropter dum in luce radiorum effusiones observantur, atque per rectas lineas significantur ejusdem reflexionis, refractionis, inflexionis leges Geometricè demonstratæ, a phænomenis naturalibus confirmantur. Dum corporum cœlestium conversiones, motus, tempora definienda sunt, leviores aberrationes ob magnam distantiam evanescent. Dum motus solidorum leges, fluidorumque pressiones & cursus inquiruntur in datis conditionibus, ubi conditiones ipsæ adsunt, aut procurari possunt, demonstrationis vis cum ipsa natura consentit. Si conditiones autem quæ requi-

runtur, vel si quæ, in ratiocinando attenduntur, tam paucæ sint, ut nunquam ad naturam ipsam transferri meditatio possit; aut si in re, prout ab ipsa natura oblata est, tam multa sint attendenda, ut omnia computando complecti observationis vim excedat, futurum facile perspicitur, ut Geometrica demonstratio, utcumque per se evidens, cum rebus minime consentiat.

Quæ quidem Mathematicæ demonstrationis a rebus ipsis discrepantia, aut a sensu multa simul implicata percipi, quæ rationis acumen enodare non potest, & omnia distincte percipere, aut data accuratiora & plura esse monet, ex quibus res ad expendendum propositæ definiuntur. Quare in Opticis nonnulla phænomena Geometricis demonstrationibus non congruunt, nisi præter radiorum lucis interfectiones & angulos ratio habeatur facultatis sentiendi, tum circa visionem judicandi, a quibus visionis

modus dependet. Magnitudo apparens eorum, quæ oculis obiecta sunt, recte æstimatur e visionis angulo, ex quo amplitudo imaginis in retina descriptæ definitur. Quæ tamen æstimatio cum ipsa re non consentit interdum; siquidem in varia distantia sub eodem angulo visæ res, diversæ quoad magnitudinem nonnunquam apparent, & major quæ magis distat, ex eo quod in iudicio de magnitudine ferendo non angulus modo visionis & distantia, sed etiam dispositio interjectorum inter oculum & rem visam corporum, ac comparatio mentem dirigant: quemadmodum perspectivæ repræsentationis Artifices norunt. Locus apparens rei per interjectum corpus translucidum observatæ, juxta Geometricas leges non est in puncto decussationis radii refracti & perpendiculi ab obiecta re excitati: & tamen in Dioptriciis absque errore ibidem ponitur, quod oculi acies tanta non sit, ut discrimen illud attingat.

Sed & in Acusticis inanis ferme esset omnis computatio numerorum quibus soni indicantur, quæ ab omni lege sensus soluta procederet, utpote cum ad auditum ipsum non pertineret. Nam & limites quasi quidam positi sunt, intra quos graves & acuti, exiles & fortes soni sensibiles continentur, quos si excedunt, plerumque aut excitata molestia sensus instrumenta pervertunt, aut levi impressione eadem non commovent, pariterque ultimæ quædam rationes sonorum ac minima intervalla sunt, quæ sensus vix percipit, quæque ideo majorum intervallorum elementa æstimantur: iique limites, & a natura varii sunt positi, & assuetudine, exercitatione extenduntur, coarctantur, certius ponuntur: ut mediis quibusdam communioribusque selectis, sonorum systemata, genera, & modi in Arte Musica constituentur, ad quæ demum applicata computatio utilis est, dum ex aliis principiis leges derivantur ad

ani-

animi & sensus oblectamentum fonis
vocibusque procurandum.

In Phycis vero si cœlestium corporum leges inquiruntur, dum phænomena fixarum Geometricè expendenda sunt, ipsæ cum immane distent inter se, & a tellure, atque vires plerasque ad immensa intervalla nequeant exercere, ita ut singularum effectus a Terricolis observentur, demonstrationes Geometricæ cum natura consentiunt, quod aut simplicissima ea sunt quæ quærentur, aut minora discrimina ultra vim observationis jacent. Planetæ primarii cum aliquam in se vim & effectum habeant, quæ computationi subjici accurate respuunt, leges Geometricè derivatæ aliquas patiuntur aberrationes, quæ tamen nonnisi post multorum annorum observationes collectæ percipiuntur, atque ad legum earundem emendationem faciunt. Planetæ secundarii non ita a suis primariis & a Sole distant, ut utriusque vim notabilem non sentiant,

tiant, unde oritur multiplex ipsorum quæ dicitur inæqualitas, & difficultas earum virium compositionem ac leges accurate computandi, qualis est quæ in Luna nostra manifeste se prodit. Quæ demum quasi nulla est, si cum inæqualitate terrestrium corporum conferatur, quæ aliorum corporum viribus innumeris ac variis agitata sunt. Ex quo fit, ut perquisitiones plurimæ in terrestri Physica valde operosa & perplexæ sint, quæ in cœlesti longe faciliores & simpliciores apparent, in qua & pauciora & minus variabilia sunt attendenda, in terrestri plurima & pluribus obnoxia mutationibus, quæ æqualitatis & proportionum curvi rectique Geometricas notiones turbant: & nihil non uniforme, constantissimum, simplex, quod Mathematica continetur accuratione: nihil non varium, multiplex, & dissimile, quod in ipsa rerum corporearum natura observandum occurrit.

Quæ cum Mathematicæ disciplinæ

in-

(XXVII)

indolem & naturam aperiant , quod exequi primum dicendo institueram , eamque proprie esse quantitatis generatim spectatæ , & a rebus corporeis abstractæ scientiam demonstrant , tum porro suadent ei limites quosdam esse natura positos , cum ad res ipsas applicatur , ut Artium incremento & perfectioni inservire queat : quod alterum erat Orationis hujus propositum . Nam in universum cum Artium aliud ejusmodi genus sit , ut per easdem animo res cernant homines , rerumque nexus & rationes , quas ipse per se animus aut sensus discernere nequit : aliud earum , quarum ope ex rebus , prout a natura offeruntur , moliantur aliquid & faciant : rerum autem notitiæ ex quantitatis notionibus & deriventur & inter se conferantur ; ea disciplina , quæ notiones easdem conferre docet aptissimeque ordinare , humanæ rationis ministra erit , atque in Artibus summa rectorix . Quare genus Artium , quibus animus rerum

im-

implexis alioquin rationibus cernendis idoneus redditur, quæ res definitas, exploratas, certisque finibus inclusas, non vagas, incertas, & ab opinionum commentis dependentes rationes inter se habent, Mathematicæ disciplinæ acceptum omne refertur. Nam quæ ad permutationes & combinationes rerum, ad eventuum probabilitates, ad monetarum valores relativos, ad ludorum fortes, ad commercia, ad publicos census, ad politicas, & œconomicas rationes æstimandas, ad justitiam in distribuendis & permutandis rebus Artes in societate civili utilissimæ habentur, cum conjectandi ratiocinandique vim magnopere amplificatam exigant, Matheos adjumento admirificam facilitatem adductæ sunt. Nautica ars, quæ tanto est utilior, quanto pluribus hominibus communis fieri potest, quæque tam multis indiget & innititur observationibus, ut itineris directio, celeritas, aberratio noscatur, mutetur, emendetur, difficili

computatione inter se conferendis ;
 adjumento Matheseos ad eam ferme
 simplicitatem redacta est, ut rudibus
 & vulgi hominibus concedatur, qui
 Tabularum ope & sphaerica resolve-
 re Triangula, & Logarithmis uti,
 Loxodromias invenire, ventorumque
 Rhombos conferre, & implicata ad-
 modum problemata enodare valent,
 quæ aut nullo modo, aut per erro-
 res innumeros experientia periculosa
 opitulante homines assequi coacti fuif-
 sent, si non adminicula, quasi fen-
 sus alii perspicaciores, essent a Ma-
 thesi suppeditata. Sed & Artes illæ,
 quæ in figurarum discernendis posi-
 tionibus, & dimetiendis magnitudini-
 bus versantur, Gæodesia, Stereome-
 tria, Stereotomia, Tactica terrestris
 & navalis, Architectura militaris,
 Geographia, Gnomonica, Astronomia,
 Perspectiva, Geometria subterranea ar-
 cto adeo vinculo Geometriæ nectun-
 tur, ut si principia, quibus ea sim-
 plicissimis utitur, a simplicitate per-

ceptionis ad rerum concretionem & coagmentationem demissa sint, in puram Geometriam omnes definant. In quo præsertim eminet Matheseos usus, ut nimirum inanem tentandi laborem auferat, ea indicando, quæ ipsa sibi concedi postulat, reliqua demonstrationibus indubiis patefactura. In iis autem ipsis datis acquirendis, quæ ipsa postulat, industria quædam ac prudentia requiritur, & eadem disciplina est adjumento. Nemo enim est qui non intelligat, Gæodesiæ, & Geographiæ idem esse per omnia propositum, nisi quod altera majores, minores altera superficiem terrestris tractus pernoscere & repræsentare studet, atque ad idem problema Geometricum utramque adduci, ut figurarum in superficie terrestris latera & anguli innotescant. Ea vero dimetiri posse ac describi Geometria postulat: monet sensus aliqua sibi esse necessaria præsidia. Qui itaque angulos terre tractus dimetiri debent, il-

li manuali opere mensuras , circumspiciendo positiones , assequuti , rem facili negotio absolvunt . Qui vero majores illi positiones aspiciendo discernere nequeunt , mensuras manuali opere exploratas erroribus obnoxias intelligunt : has itaque Trigonometriæ auxilio , positiones ex Acus magneticæ directionibus noscunt . Qui maximos demum terræ marisque tractus Geographi explorare debent , illi ea præsidia operosa plurimum , & non accurata satis deprehendunt : cum visionis lineæ inflexiones patiantur multiplices , & Acus magnetica declinationes habeat , quæ legem compertam aliquam non sequuntur , quas ideo aberrationes Astrorum observatione emendant , Matheseos vi , si ita loqui fas est , ea artificia pervadente , seque latissime propagante . Quo factum est , ut cæteræ Artes memoratæ , quæ in figuris metiendis comparandisque versantur , promotæ plurimum fuerint industria Mathematicorum ,

rum , qui earundem singulares fines habuerint perspectos, vulgo obstupente ministerii Nautici , Navalis Tacticæ , Castra metandi , evolutionum militarium solita præcepta ab iisdem & derivari, & demonstrari, & in dies augeri ac pro rerum conditionibus emendari : & eorum, quæ menti rudi ac ab omni institutione imparatæ implexa , involuta , & nullo modo attingenda sunt, intelligentiam aperiri.

Sed illæ quoque Artes , quæ ex rebus , prout a natura oblatae sunt , moliuntur aliquid & faciunt, corporum viribus, motibus , materia apte compositis, Mechanicæ appellatae , cum Mathematica disciplina communia habent fundamenta rationis , & illius societate plurimum adjuvantur. In Mechanicis artificiis tum æstimandis, tum peragendis, materiæ, ex qua constructa sunt, indoles cognita , & magnitudo membrorum , & apta partium coagmentatio , impedimentorum consideratio distincta, vis adhibendæ quan-

titas, & directionis eligendæ prudentia, effectus edendi notitia Artificis egregii munus complent, quorum aliqua cum ab experimentis cognoscenda sint, alia data, reliqua ex Mathematica demonstratione sunt elicienda, aut tentando cognoscenda; quod quidem & ab Artificis laude, & ab humanis usibus longe remotum est. Est itaque in Mechanicis artificiis omnibus, quæ ad motum excitandum, compescendum, aut alio dirigendum excogitantur, perpetuæ veritatis principium, fraudari nunquam naturam posse arte ulla, & motus quantitatem aliquam nonnisi æquali adhibita motus quantitate in quiescentibus excitari, aut in iis quæ moventur extinguere. Sed ille tantum, qui in motu velocitatis, massæ, temporum rationes discernere & evolvere noverit, in artificiis ad observandum oblatis Artificis industriam proprio consequetur ingenio, nec infcius stupebit, ac pro re nata poterit imitari diligenter, ea.

discernendo quæ necessitatis, ex iis quæ commodi aut ornamenti causa inducta sunt: & in novis invenientibus, ab iis quæ data fuerint, cognoscere quænam adhuc sit impetraturus, non casu sed ratione ductus, non tentando sed firmissime intelligendo, non spe inani sed certo consilio, quod Artificis laudandi est, proposito satisfacturus. Nam etiam artificiiis omnibus Mechanicis ex data materia ad datum finem instructis mediocrem quandam magnitudinem partium aptissimam esse, quoddam singulorum membrorum robur convenire, nihil in iisdem superfluum, nihil deficiens esse posse, id quidem vulgares Artifices experientia docet, quæ non aliud aliquid est, quam Mathematica ratio usu evoluta, eademque idcirco cum illa, quam institutio Geometrica ordine referat. Possunt enim proprio pondere ruere ac dissolvi machinæ, possunt etiam ob levitatem exterioribus momentis im-

pediri, quominus expectationi respondeant: quorum primum ex eo fit, quod eorum, quæ in machinis construendis junguntur, otiosum nihil esse queat, sed vis, qua singula polent, si ad machinæ fines non conspirat amice, vel in ejusdem destructionem tendat, vel in impedimentum convertatur, & consilii expers mole ruit sua: alterum ex eo sequitur, quod plurimæ vires sunt, quibus undique semperque corpora premuntur agunturque, & nunquam negligi debent, circumquaque fusa nimirum actiuosa naturæ principia. Utrumque vero & experientia antevertit, & ratio Geometrica; quandoquidem neutra alterius adminiculo destituta quidpiam est, aut efficit. Quis enim in exercitato Artifice rationem Geometricam usu explicatam, ejusdemque artificia dirigentem non animadvertat? aut quis in sedato maturi Geometræ studio non agnoscat methodum non tumultuariam ac fortuitam, sed

opportunitatem ac ordinatam singula observandi & expendendi, qui experientiae fructus eximius est?

Natura monemur, cum varia singulorum animantium & vegetabilium corpora sint, quatenus ipsa cum machinis comparare datum est, magnitudinis mensuram quandam magis communem speciebus singulis convenire, ut cum iis vitae ratio cuique diversa, partium figura, materiae singularis indoles, officia varia explenda obtigerint, omnibus aptissima magnitudo respondeat. Nam etsi viventium ex eadem specie, & pro aetatis ratione, & in eadem aetate magnitudines diversae observentur, tamen si materiae indoles, si figura partium singularis, si compages totius attendatur, atque ad ea munerum obeundorum alacritas, constantia, necessitas varia referatur, sapienter omnia temperata esse intelliguntur, atque ad circumfusi fluidi naturam, ad alimentorum vim, ad incrementa totius,

tius, ad facultatum opportunas evolutiones maxime accommodata. Quæ quidem per jucunda meditatio, etsi ob multarum rerum ignorationem promoveri plurimum absque errore nequeat, ostendit tamen in Mechanicis artificiis maximum esse ejus facultatis usum, quæ partium adjunctorumque omnium rationes inter se, & ad propositos fines evolvit ac explorat, quæ tota Geometrica est. Hujus suavissimam lucem eminus radiantem ex naturæ operibus homines cum aspicerent, & solo Matheſeos adjumento se frui posse intelligerent, Γεωμετρῆν τὸν Θεόν admirationis plenissimi protulerunt.

Sed in artificiis Mechanicis hominum ingenio ordinatis Geometricæ rationis usum ostendit imprimis illustre humanæ industriæ specimen Architectura Navalis, quæ cum in suis operibus tam multis prospicere finibus debeat, ac viribus uti dissimilibus, Artificum usu acquisita pru-

dentia regi nequit, iisdem non dis-
 fitentibus, sed Matheſeos ſublimioris
 auxilio perpetuo indiget. Nimirum
 navis eſt optima, quæ ſtabilis ac fir-
 ma, juncturis aquam cludentibus
 ſpiſſa, ad ferendum incurſum maris
 ſolida, gubernaculo parens, a recta
 via quam minime deſectens, a qua-
 cumque directione virium impellen-
 tium movenda facile, oneribus ve-
 hendis idonea, nautarum officiis con-
 grua, quæ in portus ſeſe recipere
 poſſit. Sed earum conditionum quam
 multiplex eſt varietas, & varietati
 quam arcte conſtructio reſpondet!
 Nam ex ſtabilitate navis velorum
 poſitus & magnitudo, ac gubernacu-
 li actio dependet, ab iisdem ut obli-
 quo rectove curſu propellatur aptius,
 ventoque conſentiat ſubtilius: ſtabi-
 litas a ponderum diſtributione, & cen-
 tri ac metacentri loco: ponderum
 diſtributio a navis figura, & lege
 varia jubente in clafſicis ac vecto-
 riis: figura a navis officio, & por-
 tuum

tuum, ad quos frequentius accedet qualitibus, definienda est. Quibus porro satisfieri debet habita ratione materiæ, membrorum magnitudinis, figuræ singularis eorumdem, nexus firmissimi, eaque omnia ita ab invicem dependere, ut unica mutata, cæterarum mutationes præcognoscantur. Quod obtineri posse quadantenus adjumento disciplinæ Physico - Mathematicæ, nec alia quapiam ratione, ingenui fatentur Artifices: rudes ac ignaros res ipsa judicat, qui practicas quasdam generales methodos aut a se, aut ab aliquibus possideri jactant. Nam neque illud verum est, si de navibus ad eosdem omnino fines construendis agatur, partium easdem proportiones ad naves diversæ magnitudinis posse absque maximo errore transferri. Quas quidem proportionem diversas requiri ille intelliget, qui sentiat rationem soliditatis a ratione superficiem in corporibus similibus & inæqualibus esse semper diversam: ut ideo,

alterutra servata , altera mutetur , & methodus quæcumque generalis inanis fiat . Ea vero methodus quoniam constans ac certa nequit haberi , temere tentando nequit emendari , nec experimentis corrigi , sed unico adjumento Matheseos perficitur . Nam qui ab ea institutione imparati sunt , illi numero eorum , quæ attendi debent , obruuntur , atque hærent impediti difficultate cuncta æstimandi , aut audaciores multa negligendo rem fortunæ committunt : qui vero ad memorata Matheseos vim afferre norunt , illi eo numero juvantur potius , dum ipsa ordinare , & eorum nexus pervidere possunt . Nam ut tentandi inutilis sæpissime labor agnoscitur , qui inconsiderate ac temere suscipitur , idemque nec ad hominum usus , nec ad Artis fines aptus , ita investigandi sagacitas explorandique solertia maxime utilitate sua commendantur . Quemadmodum vero a fortuito rerum eventu aliquo ob-

fer-

Servato homines alacri ingenio præ-
 diti, & Geometrica institutione non
 imbuti modo sed perfecti multa col-
 ligunt, quæ alios torpidiores fugiunt:
 sic in tentaminibus instituendis Geo-
 metricæ methodi fructus esse debet, ut
 ea, ad quorum cognitionem contendit-
 tur, limitibus quasi quibusdam notis at-
 que perspectis circumscribantur. Huic
 autem muneri, atque ideo Artium
 & Mechanicæ disciplinæ finibus exten-
 dendis ille imprimis par erit, qui
 ea, circa quæ operatur, cognoscat, ac-
 curate conferre sciat, novasque rerum
 comparationes instituere valeat. Ea
 porro, circa quæ quis operatur, cogno-
 scit distinctius, quo simpliciora sunt,
 aut quo sagaciore & frequentiore per-
 spexit observatione: accurate confert,
 cum quid, ex quo dependet, ordina-
 tim ingenio consequitur: res demum
 non antea comparatas animadvertit,
 qui dum eorum, quæ natura & artes
 spectanda offerunt, historiam amplam
 fidamque possidet, nativa quadam in-
 genii

genii alacritate præditus est. Facultatibus iis institutio, naturæ, vitæ usus efficiunt ut nemo plane careat, sed unusquisque aut a natura magis minusve promptas, aut defuetudine sæpe latentes ac quodammodo impeditas, aut a Scientiis magis minusve evolutas, aut etiam nonnunquam ex prava disciplinæ ratione retusas habet: cum præfertim umbratili exercitationi affueti homines ad singularia observanda descendere aut ob ignaviam nequeant, aut ob despectum recusent, animo interea in hominum usus sterilefcente. In eam enim opinionem facile delabuntur, minui majestatem humanæ mentis in rebus particularibus observandis, quarum perquisitio laboriosa, cogitatio ignobilis, expositio difficilis, communicatio indecora, numerus inexplebilis, pretium exiguum.

Quapropter qui inculcant, Mathematicos in Mechanicis artificiis minus valere, quam vulgares homines usu tantum docti, illi profecto re-

rum

rum prorsus dissimilium comparationem instituunt, si eos indicant qui nomine tenus Mathematici sunt suamque scientiam signorum & formularum cognitione terminatam habent, nec ipsa ad rerum naturam quo pacto referatur indagarunt, in suis ideo commentis otiose versantes. Ab eo nimirum hominum genere spes excitata inanis est, fore ut omnia possint Mathematicis rationibus expendi, dum hypothefibus suffectis, ubi data certis finibus inclusa natura negat, scientias & ingenia corrumpunt pessimo disciplinæ præclaræ abusu. Nam, ut multa præteream, quid tam inane, quam ut ad machinam animale, quæ non se movendi modo, sed & sentiendi facultate prædita est, qua munera obit omnia quibus fungitur, cujus ad facultatem motricem relatio penitus ignoratur, Mathematica applicetur, & perinde ac si machina sit hydraulica, motuum velocitates æstimentur, atque ut rem definito aliquo exemplo confirmem,

ut

ut numeris significandæ suscipiantur cordis vires? In qua unica perquisitione & methodorum, quæ adhibitæ sunt disparitas, & immane inter conclusa discrimen argumento esse potest, applicationem illam, si ad Artem Medicam referatur, fuisse inutilem industriam, quemadmodum saniores Medici non diffitentur; si ad Scientiam Naturalem, parum fructuosam, quæ per definita ac certa Theoremata promovetur atque perficitur. Quas ideo meditationes cum sapientiores aliqui Geometræ, tanquam rationis specimina protulisse videantur, quæ naturæ legum prospectum aliquem longinquum procurarent, eo nomine non improbandi modo, sed plurimum laudandi, qui notiones clariores per obscuris ambagibus verborum antea receptis ad philosophandum suffecerunt, alii incauti minusque sapientes pro certis ac definitis habuerunt ac dum symbolis quibusdam, & hypothefibus hærebant, sese naturæ arca-

nas leges scrutatos esse opinati sunt.

Ad vitium hoc, quo ferme incon-
sulta rerum ipsa natura Mathe-
seos immaturi cultores eandem ad omnia
applicant, proclives facit jucunditas
animi quædam in assequenda Mathe-
maticarum demonstrationum evidentia,
quæ ne minuatur aut perturbetur, aut
facilius ut possit obtineri, hypothefibus
indulgent, ea removendo, quorum co-
gnitio difficilis, aut laboriosa, aut len-
ta indagine est procuranda, eaque tan-
quam definita assumendo, quæ saga-
cior observatione adhibita certis fini-
bus inclusa non sunt. Quod dum fa-
ciunt, indolem disciplinæ pervertunt,
quæ evidentia, qua eminet, datorum
acquirendorum numerum & naturam
commonstrat. Quod si vitetur vitium,
ex quo abusus egregiæ disciplinæ pro-
fluxit, qui ex altera parte splendidis
exemplis commonefacti Mathe-
seos utilitatem eximiam in Artibus inficiari
nequeunt, ex altera vero cum non
omnes Mathe-
seos cultores in Artibus
emi-

eminere videant, ideo queruntur incertam esse Mathematicæ institutionis utilitatem, animadvertant oportet, vim inveniendi differre quamplurimum a vi inventa intelligendi, ordinandi, imitandi. Hæc rationis est opus, & disciplinæ Geometricæ methodis contineri potest, atque communicari inter homines, laudemque non exiguam ex operum accuratatione parit: vim inveniendi nulla inferit ingeniis methodus ac institutio, sed animus impertitur acer, præsens, acutus eorumque memoria excultus, quæ natura artesque observanda offerunt, ex eademque Artificum major gloria manat. Quapropter Artes, quæ ministerio quidem Matheseos utuntur, sed in inventione maximam partem positæ sunt, liberales dictæ, Musica, Architectura Civilis, Pictura, cum Geometrica principia paucissima habeant, a quibus dependant, & earum opera, sagacitate & industria vitæ oblectamento, splendori, commodis in multiplici varietate

te positis consulente excellere debeant, præceptis vix tradi patiuntur. Artes vero illæ, quæ Mechanicæ dicuntur, & principiis atque fundamentis Geometricis innituntur, & quarum opera non hominum sed naturæ arbitrio judicantur, inveniendi vi promoventur, sed cujus alacritatem Geometrica ratio temperet. Quas ideo qui facultates summas, & amico fœdere confociatas habet, ille ad Artium fines extendendos idoneus, in imitando solertissimus, in intelligendo perspicacissimus esse poterit. Non idem itaque omnibus, sed singulis maximus ab institutione Mathematica propositus fructus est, atque singulari cujusque ingenii modo congruentissimus, si ad ea quæ sunt, prout ipsa per se sunt, non prout fingi possunt, instrumentum hoc universæ rationis humanæ fuerit applicatum. Cum Mathematicæ disciplinæ, præterquamquod Philosophiæ naturalis administra est præstantissima, summa cer-

certaque utilitas fit ad Artes applicatæ, quæ in rebus versantur nec opinionum commentis, nec ingeniorum inconstantia mutabilibus, quarum in inventione & incremento jure superbire potest humanum genus, dolendum fato quodam a Scientiarum cultoribus ita ferme despici ut harum tractationis eos aut tædeat aut pudeat. Hunc vero si vobis suadere cultum potero, Adolescentes egregii & ad optima quæque a natura comparati, hac si Vobis laudis multiplicis acquirendæ patere viam exemplis demonstravero, hinc si ingenii vestri exercitationem jucundam & societati hominum utilem derivare Vos posse efficiam docendo; tum Amplissimorum Triumvirum judicio perhonorifico, quo sum insignitus, honestabor; tum hujus Exedræ decori, Gymnasii splendori, Professorum celeberrimorum societati in vestra ac publica commoda sua studia conferenti, aliquid a me detractum non esse confidam.